

निष्कलंकिनी

अंगिका खण्ड काव्य



निष्कलंकिनी कैकेयी जे, कर के अद्भुत काम
बनैलकै श्री रामचन्द्र के, पुरूषोत्तम श्री राम

हीरा प्रसाद 'हरेन्द्र'

आंगदेश, काम के लवली
सयुम भेट ।

निष्कलिकनी

(अंगिका खण्ड काव्य)

३०६
6.11.2023



महाकवि
हीरा प्रसाद 'हरेन्द्र'



चन्द्रकांता प्रकाशन

कृति

: निष्कलंकिनी

(अंगिका खण्ड काव्य)

कृतिकार

: हीरा प्रसाद 'हरेन्द्र'

ग्राम+पो० - कटहरा

सुलतानगंज (भागलपुर) 813213

मो० : 9931854246

सम्प्रति

: अवकाश प्राप्त प्रभारी प्रधानाध्यापक,

महामंत्री, अखिल भारतीय अंगिका साहित्य कला मंच

सर्वाधिकार

©

प्रकाशन तिथि

: 2017 ई० वि० संवत् - 2074

शब्द संयोजन

: श्री तारा गीता प्रिंटिंग प्रेस

व मुद्रण

: खलीफाबाग चौक, भागलपुर

आवरण

: पप्पू पाल

प्रकाशक

: चन्द्रकांता प्रकाशन

सहयोग राशि

: 100/-रु०

NISHKALANKINEE

By Hira Prasad 'Harendra'

समर्पण



(02.01.1946 से 18.07.2016)

ममता की मूर्ति, दया की देवी, आत्मीयता के सागर,
अध्यापन कार्य निपुणा, हीरा के हीरा के दर्जा दिलावै वाली,
सात संतानों की जननी आरू वकील प्रसाद सिंह के द्वारा
भरलोँ माँग के शोभा चिता तक साथ लेँ जाय वाली,
स्नेहमयी शकुन्तला केँ सादर सप्रेम.....

हरेन्द्र

एक -दू बात

धर्मशास्त्र के पन्ना-पन्ना में महिला के वनिस्पत पुरुष वर्ग के प्रधानता समैलों छै। नारी के उज्ज्वल व्यक्तित्व आरू कृतित्व के मटियामेट करै के प्रयास होलों छै। “नारी यत्र पूज्यते, रमन्ते तत्र देवता”, ‘मही के हिलाय दै वाली महिला’ सब सूक्ति महिला सें काम लै घरी प्रयोग करलों जाय छै। ‘ढोल, गँवार, शूद्र, पशु, नारी’ सें लें के ‘नारी स्वभाव सत्य कवि कहहि। अवगुण आठ सदा उर रहहीं’ तुलसी बाबा के ई चौपाई नारी के कूप-मण्डुक बनाय के राखी देनें छै। तभी ते आय नारी जागरण, नारी उत्थान, नारी सशक्तीकरण, अन्तरराष्ट्रीय महिला दिवस, महिला कल्याण दिवस अहिनों संस्था आरू उत्सव आयोजन के आवश्यकता पड़ी गेलै। नारी के ज्ञानाजन, शिक्षा, सम्पत्ति के अधिकार सें बंचित राखलों गेलै।

जंगल के साम्राज्ञी ताड़का पर्यावरण के रक्षा लेली जंगल के उजाड़ै वाला सन्त-महात्मा के यज्ञ में लकड़ी जलावै सें रोकै छेलै, मगर यज्ञविध्वंशकारणी के रूपों में ओकरो वध करलों गेलै। महाविदुषी महिला होलिका विज्ञान वेतु छेलै। जे चादर ओढ़ी के आग में बैठी गेला पर आग, जलाबे नैं पारै रहै, ऊ चादर निर्माण में होलिका के महारत हासिल छेलै। ईश्वर भक्ति में लीन होलिका भक्त प्रल्हाद के बचाबै लेली प्रह्लाद के देहों पर चादर डाली के अपने जली के स्वाहा होय गेलै। मगर कलमकार के ई गँवारा नै, उल्टे ईश्वर भक्त के जलाबै के पाप होलिका के माथा पर मढ़ी देलों गेलै।

कैकेयी वीरांगना छेलै। युद्धभूमि में अचेत पड़लों राजा दशरथ के विजय प्राप्त करी विजय माल पहराबै वाली कैकेयी राम के आग्रह पर राम के अविर्भाव के सार्थक बनाय लेली नाटक रचलकै ऊ नाटक के पर्दा उठला में ही साधु-संत, ऋषि-मुनि-ज्ञानी रावण के आतंक सें परित्राण पैलकै। भूमि के भार

हल्का होलै। शाति के साम्राज्य छैलै आरू रघुवंशी राम कुल के मर्यादा जोगत होलौ महामानव कहलैलै।

अपना-अपना घरों में कोय व्यक्ति कोय तरह के पूजा-पाठ यज्ञ चाहे कोनों अनुष्ठान करै छै तें अपनों जन-परिजन, सगा-संबंधी के संभवतः बोलावै के प्रयास करै छै। राजा दशरथ राम के राज्याभिषेक अहिनों पावन अनुष्ठान में भरत आरू शत्रुघ्न के ननिहाल सें बुलाना उपयुक्त नैं समझलकै। भरत के नाना आरू राजा जनक के आमंत्रण भेजलौ नैं गेलै। ई सब बातों पर केकरो ध्यान नैं, कैकेयी के नाटकीय वरदान के सर्वोपरि बनाय अहिनों बदनाम करलौ गेलै कि दू-चार सौ गामों में घूमी देखो, कोय अपनों बहिनी या बेटी के नाम कैकेयी तें राखै नैं पारै।

रामचन्द्र सें विचार-विमर्श के बात नैं रहतियै तें भरत लेली राजगद्दी तें कैकेयी आसानी सें मांगें पारै रहै, कहिनें कि उनको पिताजी तें राजा दशरथ सें शादी यही शर्त पर करने छेलै कि कैकेयी सें उत्पन्न संतान ही राजगद्दी के हकदार होतै। राम चरित मानस' में राम के केन्द्र में राखी हर मर्यादित कामों के रूपायित करलौ गेलौ छै। रामेश्वरम् में शिवलिंग के स्थापना लेली राम के साथ सीता के गठबंधन अनिवार्य समझी रावण द्वारा सीता के साथ लानी कार्य के अंजाम देना, मरनासन्न रावण के पास राम के द्वारा नीति सीखै लेली, लक्ष्मण के भेजना, रावण के महानता सिद्ध करै वाला ई बातों के नजर अंदाज करना रचनाकार आवश्यक समझलकै जहाँ तक वनवास के बात छेकै, राम के साथ छेलै। "जीव बिनु देह नदी बिनु वारि, वैसहि नाथ पुरुष बिनु नारी" कही के लाख समझैल्लौ पर सीता जंगल जाय से अपना-आप के नैं रोके पारलकै। विशेष आग्रह पर ही सही लक्ष्मण भी साथ नैं छोड़लकै। राजा दशरथ राम के बिना नैं रहें पारतियै, ई सोची के जंगल हुनियों चल्लो जैतियै। दू - बेटा आरू पुत्रबधू साथें जंगल में मंगल मनैतियै। श्रवण कुमार के प्रसंग में शाप के बात कहलौ जाय तें कुच्छू दिन के लेली शाप आरू टलतियै। लक्ष्मण के शक्ति वाण लगला पर विलाप के क्रम में राम कहै छै - 'जों जानतहुँ वन बंधु बिछोहू पिता वचन मानतउ नहीं सोउ', हमरा जानतें रामचरित मानस के कोनो चौपाई में राजा दशरथ अपनौ

मुँहों से राम के वनवास जाय लेली नै कहने छै। राम तेँ आपनों अवतार के सार्थकता लेली सब सोची-समझी केँ करने छै। हम्में यहेँ सच्चाई केँ तुलसी बाबा के उक्ति 'मति अनुरूप राम गुण गाऊँ' सेँ प्रभावित होय केँ मति के अनुरूप कैकेयी के चरित्र केँ निष्कलाकिनी के रूपों में प्रस्तुत करै के प्रयास करने छियै। स्वर्गीय परमानंद पाण्डेय के धर्मपत्नी स्वर्गीया वागीश्वरी देवी पाण्डेय तेँ परमा अगिका' में शताधिक रामायण के नामों के उल्लेख करने छै। कुछ तथ्यों के भिन्नता सब में समैलो छै। स्वर्गीय उमेश जी नेँ 'कैकेयी के अन्तर्द्वन्द' में कैकेयी के उज्ज्वल पक्ष केँ समाज के सामने बहुत पहिन्हें लानने छै। उनकोँ संदर्भ ग्रंथ आरू खोज ही हमरोँ लेखनी केँ अधिक बल देलकै। उनका प्रति आभार व्यक्त करै छियै। आभारी तेँ छियै तुलसी दास सेँ लेँ केँ हौ सब्मे रचनाकारों के जौनेँ सिनी एकरा संबंध में कुच्छू - कुच्छू लिखने छै। एतनेँ नै आभारी तेँ छिये डॉ० ब्रह्मदेव नारायण सत्यम के सम्यक विचार आरू वकील प्रसाद सिंह के प्रकाशन में सहयोग लेली भी।

अंततः पाठकोँ सेँ जों कुछ कहना छै तेँ यहेँ कि पाठकगण अन्तर्यामी होय छै। हों, एक बात जरूर बोलबै कि पाठक के हस्तक्षेप कहिनोँ हुवेँ? निवेदन एतनेँ छै कि मधुमक्खी कभी फूलों केँ डंक नै मारै छै। बिना फूलों केँ नुकसान पहुँचनेँ वेँ ओकरा सेँ ऊ निकाली लै छै, जे ओकरा चाही। पाठक के बर्ताव कुछ अहिनेँ हुवेँ ते अहोभाग्य! अतः पाठक के प्रतिक्रिया आरू जबरदस्त हस्तक्षेप के प्रतीक्षा में:

हरेन्द्र



सर्ग के सार

- पहला सर्ग : विषय प्रवेश, देश महिमा, नारी के रूप, नारी उपेक्षा ।
- दूसरा सर्ग : कैकेयी - दशरथ विवाह (शर्त के साथ), देवासुर संग्राम, कैकेयी द्वारा जीत हासिल, वरदान, थाती ।
- तीसरा सर्ग : दशरथ के घर चार पुत्र, विश्वामित्र के यज्ञ, अहिल्या उद्धार, धनुष भंग, विवाह, राज्याभिषेक प्रस्ताव ।
- चौथा सर्ग : राम द्वारा कैकेयी माता से वरदान माँगे ले प्रेरित, आनाकानी, कठोर वचन, वरदान ले तैयार ।
- पाँचवाँ सर्ग : रानी के कोप भवन में जाना, राजा पर जादू के डोर, राजा वरदान दैले तैयार, भरत के राजगद्दी, राम के वनवास के माँग ।
- छठा सर्ग : दशरथ के दयनीय दशा, सुमित्र आरू राम के आना, कारण जानना, जंगल ले तैयार होना ।
- सातवाँ सर्ग : अयोध्या में शोक, तापस भेष में राम-लखन सीता के वन गमन ।
- आठवाँ सर्ग : दशरथ के स्वर्गवास, भरत के अयोध्या आना, कैकेयी पर क्रोध, दाह संस्कार ।
- नौवाँ सर्ग : राम के वन से लौटना, सब से मिलना, भरत से माता कैकेयी को माता कहवाना, उपसंहार ।



कैकेयी सर्ग-एक

धर्म भूमि ई भारत छेकै,

धर्म सदैव महान ।

ईश्वर के अवतार यहीं पर,

गाबै वेद-पुराण ॥ 1 ॥

धरती पर के अन्यायी सब,

ऊपर भोगै दण्ड ।

ऊपर जे अन्याय करै छै,

टूटै यहाँ घमण्ड ॥ 2 ॥

गंगा अहिनों पतित-पावनी,

नै रहलै अपवाद ।

धर्म ग्रंथ उलटाबो आरू,

करो कहानी याद ॥ 3 ॥

पाप-ताप सैं तप्त धरा पर,
 नारी के छै मोल ।
 जकरो बस अपमानें देखीं,
 जीवन में विष घोल ॥ 4 ॥

पढ़ो महाभारत-रामायण,
 नारी के पहचान ।
 जकरा खातिर युद्ध भयंकर,
 सब्झै लेभो मान ॥ 5 ॥

सरस्वती, लक्ष्मी ते नारी,
 नारी दुर्गा माय ।
 नारी के रूपो में राधा,
 पराशक्ति कहलाय ॥ 6 ॥

जहाँ-जहाँ नारी के पूजा,
 वहाँ बसै भगवान ।
 धर्मशास्त्र के पन्ना पलटो,
 लिखलो ई अख्यान ॥ 7 ॥

तइयो उपेक्षिते छै नारी,
 देखो कोनों ग्रंथ ।
 झाँपी-पोती के बतलैथों,
 तोरा भले महंथ ॥ 8 ॥

कृष्ण - सुदामा साथ पढ़लकै,
सांदीपन लग जाय ।

कौरव - पाण्डव भी शास्त्रो मे,
द्रोण शिष्य कहलाय ॥ 9 ॥

रामचन्द्र चारो भाई ले,
छेलै गुरु वशिष्ठ ।

शास्त्र बताबै जकरा वश मे,
रहै सर्वदा इष्ट ॥ 10 ॥

नारी लेली नै विद्यालय,
नै आश्रम झलकाय ।

कहाँ करलकै ज्ञानोपार्जन,
जरा समझ नै आय ॥ 11 ॥

कैकेयी भी नारी छेलै,
उनको अद्भुत काम ।

होलै लेकिन ई धरती पर,
बढ़िया सें बदनाम ॥ 12 ॥

सब्जी मे कदीमा बातरो,
अन्नो बीच कलाय ।

कैकेयी नारी मे वैसें,
ठीक समझलो जाय ॥ 13 ॥

गाँव-मुहल्ला घूमो सगरे,
 धिया पुता के नाम ।
 कैकेयी भूल्हौं नैं राखै,
 कहिनों छै बदनाम ॥ 14 ॥

ऊ कैकेयी के करनी के,
 समझो - बूझो भाय ।
 जौनें रामो के कामो के,
 धरती पर चमकाय ॥ 15 ॥

सार्थक जन्म बनाबै जौनें,
 राखी शीश कलंक ।
 ऊ नारी नैं नारी छेलै,
 तारा बीच मयंक ॥ 16 ॥

बनै महामानव; मानव से,
 कौशल्या के लाल ।
 बदनामी के टीका देखो,
 कैकेयी के भाल ॥ 17 ॥

रावण वध के लेली जानो,
 रामो के अवतार ।
 इन्द्रासन डोलाबै छेलै,
 जकरो अत्याचार ॥ 18 ॥

ऋषि-मुनि-ज्ञानी दर्शन पाबी,
गेलै भव सें पार ।

खोजी-खोजी धरती पर के,
पाप करलकै क्षार ॥ 19 ॥

ई सब केना संभव छेलै,
राम करतियै राज ।

काम करतियै बाधित सब्भे,
माथा पर के ताज ॥ 20 ॥

कठिन समस्या दूर करलकै,
कैकेयी के चाल ।

जकरा खातिर रामचन्द्र भी,
रहै सदा बेहाल ॥ 21 ॥

ऊ कैकेयी माता केरौं,
रामें पूजै गोड़ ।

जीनें लानै रामचन्द्र के,
जीवन में कुछ मोड़ ॥ 22 ॥



सर्ग-दू

कैकेय देश के राजकुमारी,
कैकेयी के चाल ।
देखी-देखी लट्टू छेलै,
राजा अज के लाल ॥ 1 ॥

विन्दुमती अज दोनों प्राणी,
जानै जखनी बात ।
शादी के प्रस्ताव पठाबै,
तत्क्षण रातो-रात ॥ 2 ॥

दशरथ के मन पुलकित होलै,
जानी केँ प्रस्ताव ।
पर कन्या पक्षों सँ ऐलै,
अनुचित एक सुझाव ॥ 3 ॥

शादी होना संभव बिल्कुल,
जों नै हुवेँ मलाल ।
दशरथ के उत्तराधिकारी,
कैकेयी के लाल ॥ 4 ॥

दोनों पक्षें समझी-बूझी,
शर्त करै स्वीकार ।
दशरथजी के गल्ला शोभै,
कैकेयी के हार ॥ 5 ॥

कौशल्या, कैकेयी आरू,

प्रिया सुमित्रा साथ ।

राजा दशरथ खूब बँटाबै,

राज-काज में हाथ ॥ 6 ॥

देवासुर संग्राम पसरलै,

धनुष-वाण लेँ हाथ ।

राजा दशरथ समर भूमि में,

कैकेयी भी साथ ॥ 7 ॥

लड़तें-लड़तें मूर्छित होलै,

दशरथ जी निस्तेज ।

कैकेयी नैं भोगै वाली,

फूलों करोँ सेज ॥ 8 ॥

असुरों सें संग्राम करलकै,

रूप धरी विकराल ।

समर भूमि में नाचै लगलै,

असुर दलों के काल ॥ 9 ॥

देवासुर संग्राम जितलकै,

दशरथ केँ जयमाल ।

राजा दशरथ गद-गद होलै,

बोलै होश सम्हाल ॥ 10 ॥

माँगो - माँगो रानी माँगो,
हमरा सें वरदान ।
तोरा सें हमरो छै अखनी,
धरती पर सम्मान ॥ 11 ॥

‘हर बढ़िया कामो के लेली,
जों चाहौं वरदान ।
राजा के रानी कहलाबौं,
झूठा ई अख्यान’ ॥ 12 ॥

‘नै-नै अहिनों बात यहाँ नै,
मन मे छै उल्लास ।
सोची समझी अखनी माँगो,
हमरा सें कुछ खास’ ॥ 13 ॥

‘बात यहें छै ठीक अगर ते,
थाती तोरा पास ।
वक्त अगर कुछ ऐलै अहिनों,
माँगी लेबै खास’ ॥ 14 ॥

सुनयै राजा हखित होलै,
कैकेयी खुशहाल ।
आगू देखो की लिखलो छै,
दोन्हूँ केरो भाल ॥ 15 ॥



सर्ग-तीन

चौथापन में राजा दशरथ,
 पैलक सब संतान ।
 चारो पुत्रों बीचें छेलै,
 दशरथ जी के प्राण ॥ 1 ॥

विनय, शील, गुण निगुण लखाबै,
 दशरथ के सब लाल ।
 शास्त्र बताबै चारो छेलै,
 कालों करों काल ॥ 2 ॥

विश्वामित्र महामुनि छेलै,
 ज्ञानों के मर्मज्ञ ।
 जहिया-जहिया करना चाहै,
 जंगल में जब यज्ञ ॥ 3 ॥

राक्षस दल आबी-आबी के,
 करै यज्ञ के भंग ।
 यज्ञ सम्हारे मोंगी लानै,
 राम-लखन के संग ॥ 4 ॥

मुनि के यज्ञ सम्हारै लेली,
 लक्ष्मण साथें राम ।
 जंगल पहुँची राक्षस केरों,
 करलक काम तमाम । 5 ॥

धनुष यज्ञ देखै के खातिर,
 मिथिला करै पयान ।
 रस्ता बीच अहिल्या तारै
 जे छेली पाषाण ॥ 6 ॥

आगू चललै शीघ्र जनकपुर,
 पहुँचै मुनि के संग ।
 मुनिवर के इच्छा जानी के,
 करै धनुष के भंग ॥ 7 ॥

जयमाला गल्ला में डालै,
 सिया राम के जाय ।
 सुनी सुनैना हर्षित होली,
 मन्द - मन्द मुस्काय ॥ 8 ॥

भरत-माण्डवी, लक्ष्मण साथें,
 जँचै उर्मिला खूब ।
 श्रुतिकीर्ति शत्रुघ्न के जोड़ी,
 देखी सब के हूब ॥ 9 ॥

चारो करों चारो जोड़ी,

देखी हर्ष अपार ।

सबै करों स्वागत लेली,

अवधपुरी तैयार ॥ 10 ॥

अवधपुरी में उत्सव करों,

झलकै छेलै रंग ।

जन्नें देखो, जकरा देखो,

पीनें लागै भंग ॥ 11 ॥

तीनों माता हर्षित पूरा,

जन-जन में उत्साह ।

राजा दशरथ के उमंग के,

कौनें पैतै थाह ॥ 12 ॥

पुत्री सब के बिदागरी, सें,

लोर सुनैना आँख ।

लागै जेना पक्षी करों,

कटलै दोनों पाँख ॥ 13 ॥

खाना-पीना कुछ नै भावै,

पकड़ी बैठै माथ ।

पुत्री सब करों वियोग में,

लागै सदा अनाथ ॥ 14 ॥

ऐलै खबर सुनैना केरो,
 लेनें एगो दूत।
 विश्वासो के लेली छेलै,
 पासें एक सबूत ॥ 15 ॥

तखनी सुनी सुनैना केरो,
 आग्रह सब्भे भाय।
 खुशी-खुशी सें दर्शन लेली,
 जनकपुरी सिधिआय ॥ 16 ॥

कुछ दिन रहलै जनकपुरी में,
 हर्खित राज विदेह।
 रखै सुनैना आँखी आगू,
 खूब लुटाबै नेह ॥ 17 ॥

पुनः अयोध्या लौटै छेलै,
 रस्ता में कुख्यात।
 राजा लोग मचाबै लगलै,
 तब भारी उत्पात ॥ 18 ॥

धनुषयज्ञ में मुँह की खेलो,
 रहै लगैनें घात।
 वहाँ करलकै धनुष-वाण के,
 जोरो सें बरसात ॥ 19 ॥

मार भगावै सब राजा केँ,
 दशरथ के संतान ।
 मगर भरत कुछ घायल होलै,
 जकरोँ नैं अनुमान ॥ 20 ॥

चंगा होथैं मन बहलाबेँ,
 भरत चलै ननिहाल ।
 माण्डवी, ऋतिकीर्ति भी साथें,
 साथ शत्रुहन लाल ॥ 21 ॥

कुछ्छू समय यहीना बीतै,
 खूब करै सुख भोग ।
 रामचन्द्रजी राज चलाबै,
 केरोँ होलै योग ॥ 22 ॥

राजा बोलै कोमल वाणी,
 गुरु वशिष्ठ के पास ।
 'हे गुरुदेव पुराबोँ हमरोँ,
 जे मन मेँ छै आस ॥ 23 ॥

रामचन्द्र केँ राजतिलक देँ,
 करी दहोँ युवराज ।
 पूरा पुरजन, परिजन होतै,
 हरखित सकल समाज ॥ 24 ॥

हे राजन तोरा पुत्रों के,
 नाम रहै दिन-रात ।
 तोरा तेँ ईश्वर देनें छौं,
 ई सुन्दर सौगात ॥ 25 ॥

शुभ मुहुर्त भी आबी गेलै,
 नै करना छै देर ।
 तोरण, कलश, पताका सगरे,
 सजबोँ बेर-सबेर ॥ 26 ॥

समाचार मंगल जानी केँ,
 हरखित छै रनिवास ।
 अवधपुरी मेँ फैली गेलै,
 चहुँदिश हर्षोल्लास ॥ 27 ॥

सुनी शकुन शुभ सीता जी के,
 फड़कै मंगल अंग ।
 मंगल कलश सजाबै तखनी,
 मन मेँ भरल उमंग ॥ 28 ॥

पुर नर-नारी नाचै - गाबै,
 सब्बे छेलै मग्न ।
 आस लगनें सोचै छेलै,
 कखनी छै शुभ लग्न ॥ 29 ॥

कवित्त

रामें ई खबर सुनी, बैठी गेलै सिर धुनी,
 अखिया बहाबै छेलै, अश्रु केरोँ धरबा ।
 कहिनोँ मुहुर्त्त ऐलै, हाथें हथकड़ी होलै,
 फसरी में फसी गेलै, आय देखोँ गरबा ।
 तिलक लगाइ देतै, राज भी गछाई देतै,
 गला पहनाई देतैं, फूलोँ केरोँ हरबा ।
 जंगल पहाड़ जहाँ, सिंहोँ के दहाड़ जहाँ,
 ऋषि-मुनि केरोँ होतै, कैसेँ उपकरबा ॥ 30 ॥

धरमोँ के हानि होलै, लोग अभियानी होलै,
 ओकरोँ उकान छेकै, हमरोँ उदेशवा ।
 साधु-सन्त भोगी रहै, असरा में लागी रहै,
 सुरक्षा ऊ जान छेकै, हमरोँ उदेशवा ।
 मेटी देबै दुराचारी, एकांएकी पारा-पारी,
 खोजी सुनसान छेकै, हमरोँ उदेशवा ।
 भूमि केरोँ भार हरी, आतंकी सुधार करी,
 सबके कल्याण छेकै, हमरोँ उदेशवा ॥ 31 ॥

सोरठा

गुरु वशिष्ठ लग जाय, लोर बहाबै आँख सें ।
 हमरा देँ समझाय, जन्मों के उद्देश्य की ॥ 32 ॥
 गुरु वशिष्ठ घबड़ाय, देखी हालत राम के ।
 बोलै यों समझाय, की कारण ई शोक के ॥ 33 ॥

दोहा

हे गुरुवर सर्वज्ञ छौं, कर जोड़ै छी आय ।
राज-पाट नैं चाहियोँ, कोनों करोँ उपाय ॥ 34 ॥

बात बुझलकै देर सें, सोचेँ लगलै खूब ।
राज तिलक कल राम के, रामोँ केँ नैं हूब ॥ 35 ॥

जन्मों के उद्देश्य की, धूरे मन मेँ बात ।
दुखहारी श्रीराम छै, गुरु वशिष्ठ केँ ज्ञात ॥ 36 ॥

गुरुवर बोलै वत्स तों, सही करैल्लेँ याद ।
निशाचरोँ सें देश केँ, करना छै आजाद ॥ 37 ॥

ई कामोँ मेँ चाहियोँ, कैकेयी के साथ ।
अगर मनाबोँ जाय तों, जोड़ी दोनों हाथ ॥ 38 ॥

राजा दशरथ पास छै, बाँकी इ बरदान ।
माँगै के आग्रह करोँ, देखी केँ सुनसान ॥ 39 ॥

गुरुवर केरोँ बात सें, राम रहै संतुष्ट ।
करना वहैँ उपाय छै, मिटै धरा के दुष्ट ॥ 40 ॥

गुरुवर सें आशीस लै, रामचन्द्र कर जोड़ ।
मन मेँ सोच विचार कर, सदा बढ़ाबै गोड़ ॥ 41 ॥



सर्ग-चार

श्री रामचन्द्र मन-मन सोचै,

माता केँ आज मनाना छै ।

विप्र, धेनु, सुर, संतोँ लेली,

जन्मोँ के मर्म बुझाना छै ॥ 1 ॥

माता मेँ उत्तम छै माता,

सब घरम-करम जानै वाली ।

मैया अपना जानों सें भी,

बढ़लोँ हमरा मानै वाली ॥ 2 ॥

देखै छी आय असर कतना,

मैया के ऊपर लानै छी ।

मैया हमरा लेली होतै,

तैयार हमेशा मानै छी ॥ 3 ॥

रात जखनियें बारह बजलै,
 श्री रामचन्द्र सिधियाबै छै
 माता के दरवाजा खट-खट,
 हाथों सें ठोक बजाबै छै ॥ 4 ॥

चौंकी उठलै मैया सुनथैं
 आबी के दरवाजा खोलै ।
 जब रामचन्द्र पर नजर पड़ै,
 तब मधुर वचन मैया बोलै ॥ 5 ॥

ऐलौ कोन मुसीबत बेटा!
 हमरा जल्दी तों बतलाबें ।
 तो मध्य रात में आबै के,
 की कारण हमरा समझाबें ॥ 6 ॥

‘राज्याभिषेक कल हमरो छै,
 मैया तों सब्भे जानै छो ।
 सब बेटा सें बढ़लो हमरा,
 तोहीं हरदम्में मानै छो’ ॥ 7 ॥

सुनथैं मैया हर्खित होलै,
 मोती के थाल दिखाबै छै ।
 सोना-चाँदी ढेरी लेनें,
 रामों के आगू आबै छै ॥ 8 ॥

बहुमूल्य चीज देखें बेटा,
 कल हमरा यहँ लुटाना छै ।
 यही दिनाँ खातिर धरलोँ,
 ई सब्बे माल-खजाना छै ॥ 9 ॥

माता कैकेयी के नाटक,
 देखी-देखी चिन्तित होलै ।
 योजना सकल आगू केरोँ,
 सोचै मन-मन केना खोलै ॥ 10 ॥

देख राम के चिन्तित मुद्रा
 कैकेयी पर पानी पड़लै ।
 लागै बाढ़ोँ के पानी सें,
 अन-धन सब्बे कोठी सड़लै ॥ 11 ॥

माता बोलै बेटा बोलें,
 कहिनें चिन्ता भरलौ मन में ।
 महा कठिन ऊ कोन समस्या,
 ऐलौ तोरा ई जीवन में ॥ 12 ॥

रामो बोलै अवसर देखी,
 माता तों सब कुछ जानै छोँ ।
 हमरोँ जीवन के मर्यादा,
 तोहीं खाली पहिचानै छोँ ॥ 13 ॥

‘जकरोँ दुख-दरदोँ केँ देखी,
 देवलोक मेँ मचलै शोर ।
 निशाचरोँ के ताकत बढ़लोँ,
 नैं चलतै ककरोँ भी जोर ॥ 14 ॥

ऊ अन्यायी नाश करै के,
 सोचोँ मैया जरा उपाय ।
 नें तेँ दिन-दिन बढ़ले जैतै,
 धरती ऊपर ई अन्याय’ ॥ 15 ॥

‘बात समझ मेँ ऐलै बेटा,
 पर हम्मेँ बिल्कुल लाचार ।
 हर बढ़िया कामोँ मेँ होतै,
 बाधक सगरे तोरोँ प्यार ॥ 16 ॥

हमरा यै मेँ की करना छै,
 सोचै मेँ हम्मेँ नाकाम ।
 हमरा तेँ आँखी के आगू,
 नाचै छै बस एक्के राम’ ॥ 17 ॥

‘काम धैर्य सें लेभो मैया!
 सब्यै के होतै कल्याण ॥
 पूज्य पिताजी माथा पर छों,
 दू-दू ठो तोरोँ वरदान ॥ 18 ॥

माँगी के अवसर ऐलोँ छै,
 नैँ होतै कोनों व्यवधान ।
 भरत लाल केँ राज तिलक तों,
 माँगी लेँ पहिलोँ वरदान' ॥ 19 ॥

सुनयैँ मूर्छित होलै मैया,
 नैँ रहलै देहोँ मेँ खून ।
 धरती पर गिरलै वोहीना,
 लकड़ी जेना लगलोँ घून ॥ 20 ॥

होश सम्हारी फेनुँ बोलै,
 कहिनैँ ई होतै अन्याय ।
 अहिनों बोल निकालै वाली,
 चण्डालिन ऊ होतै माय ॥ 21 ॥

हमरा प्राणों सें तों प्यारोँ,
 हमरा खाली चाही राम ।
 हम्में की सारी दुनिया छै,
 रामोँ बिन बिल्कुल नाकाम ॥ 22 ॥

वोही बीच सुनाबै रामें,
 नैँ छेलै जकरोँ आभास ।
 दोसर वर माँगी लेँ मैया,
 चौदह बरस राम वनवास ॥ 23 ॥

राम उठाबै कैकेयी केँ,
 कैकेयी होलै निस्तेज ।
 ऊ कैसेँ काँटों पर बुलतै,
 जकरा छै फूलों के सेज ॥ 24 ॥

कैकेयी बोलै पहिलों वर,
 माँगी लौं बिल्कुल आसान ।
 पर दोसरका वर माँगी सेँ,
 पहिनेँ निकलै हमरोँ प्राण ॥ 25 ॥

पिल्लू पड़तै मुँह मेँ तकरा,
 जे बोलेँ अनहोनी बात ।
 राम बिना बेचैन प्रजा लेँ,
 मुश्किल छै जीना दिन-रात ॥ 26 ॥

‘मोह हृदय सेँ त्यागोँ माता,
 तभिये होतै कोनों काम ।
 सिर्फ अयोध्या वासी लेली,
 नै ऐलै धरती पर राम’ ॥ 27 ॥

‘कौशल्या आँखी के तारा
 कैकेयी गल्ला के हार ।
 भूली कैसेँ भागी जैभेँ,
 बहिन सुमित्रा के उपकार ॥ 28 ॥

राजा केरों प्राण पखेरू,
 उड़तै सुनी अमंगल बात ।
 तखनी जन-जन के आँखी सें,
 बिन बादल होतै बरसात ॥ 29 ॥

“सब्भें बात सही छै माता!
 बनोँ यहाँ पर नैं अनजान ।
 काम महा शुभ तोरा द्वारा,
 होना छै तोरा अनुमान ॥ 30 ॥

अभी राम मानव हे माता,
 महामानव चाहोँ बनाय ।
 माँगी लेँ वरदान अखनियें,
 नैं छै कोनों अन्य उपाय’ ॥ 31 ॥

‘बड़ा कठिन छै बात राम ई,
 मानी गेलौँ हम्में हार ।
 हमरा ऊपर थू-थू करतै,
 जानी लेँ सौँसे संसार’ ॥ 32 ॥

हमरा सें बेशी छौँ मैया,
 तोरा लेली ई संसार ।
 तब तेँ अखनी तोरा आगू,
 मानी गेलौँ हम्में हार ॥ 33 ॥

अगर महामानव के दर्जा,
 तोरा चलतें पैतै राम ।
 बेटा लेली कष्ट उठाना,
 नैं छै अनहोनी ई काम ॥ 34 ॥

पर छेकौं सौतेला बेटा,
 कहिनें करभो ई उपकार ।
 अपनाँ लेँ तेँ जान गमैथैं,
 छै सब दिन पूरा संसार ॥ 35 ॥

भरत लाल गर बात कहतिहों,
 होतिहो मैया तों तैयार ।
 स्वारथ केरोँ बात हमेशा,
 करतें ऐलोँ छै संसार ॥ 36 ॥

ब्यंग्य वचन रामोँ के तखनी,
 कैकेयी पर असर दिखाय ।
 रामोँ के आगू मेँ आबी,
 बोलै छै पूरा घबड़ाय ॥ 37 ॥

जो रे बेटा! काल देखिहैं,
 सौतेली माता के काम ॥
 की-की नाटक करबै हम्मैं,
 होतै पूरा काम तमाम ॥ 38 ॥

कैकेयी के बात सुनी केँ,

रामचन्द्र मन-मन मुस्काय ।

बोलै मैया धन्य-धन्य छेँ,

तोरा आगू शीश झुकाय ॥ 39 ॥

एक बात जानी लेँ मैया,

गुरु वशिष्ठ जानै छै बात ।

तोरा हमरा छोड़ी अखनी,

बात रहेँ पूरा अज्ञात ॥ 40 ॥

अगर तीन सें चार जानतै,

निष्फल होतै सब्बे काम ।

मर्यादा के अन्दर सब्बे,

गुरु वशिष्ठ, माता, या राम ॥ 43 ॥

राम गोड़ मैया के छूबी,

आशिष लै तखनी भरपूर ।

धीरें-धीरें डेग बढ़ैनेँ,

गेलै तब नजरोँ सें दूर ॥ 42 ॥

देखोँ दुनिया आँख पसारी,

माँ बेटा के अद्भुत बात ।

बेचैनी मेँ कैकेयी के

बीती गेलै पूरे रात ॥ 43 ॥



सर्ग-पाँच

कैकेयी भिखारिनी के वेषवा बनानै आरू,
 जेवर उतारी फेकै घर पिछुआड़ी में ।
 अंग वस्त्र देखी-देखी अचरज लागतिहों,
 चलनी सें बदतर छेद रहै साड़ी में ।
 लामी-लामी केशिया केँ मुँहों पर लटकाबै,
 आँख झलकाबै जेना फूल लागै झाड़ी में ।
 गौर करी देखला पेँ आँखी में उफान छेलै,
 उठलै तूफान जेना बंगालोँ के खाड़ी में ॥ 1 ॥

कोप रे भवनमा के नाम दशरथ सुनै,
 सहमै डरोँ सें आरू गोड़ लइखड़ाबै छै ।
 जकरोँ भुजा के बल इन्द्र भी निडर फिरे,
 नारी के बेरूखी पर बोहो घबड़ाबै छै ।
 वज्र वो त्रिशूलवा के चोट नैं असर करै,
 रतिदेव वणमा सें सोहो मुरझाबै छै ।
 शुभ घड़िया में देखी मेघवा बिपतिया के,
 कोप रे भवनमा में दशरथ आबै छै ॥ 2 ॥

कैकेयी के दशा विलोकी, दशरथ जी घबड़ाय ।
 बदन भिड़ाबै हाथ जरा सा, रानी मुँह चमकाय ॥ 3 ॥

भींगी बिल्ली राजा बनलै, बात समझ नैं आय ।
कोन मुसीबत आगू ऐलै, सोची मन पछताय ॥ 4 ॥

राजा बिल्कुल नम्र भाव सें, बोलै बोलोँ बात ।
तोरा मानों-सम्मानों पर, होलै की आघात ॥ 5 ॥

तोरा खातिर एक बनैबै, ई धरती आकाश ।
हमरा खाली होना चाही, जुल्मों के आभास ॥ 6 ॥

राजा फेनू छूवेँ चाहै, दिखलाबै तब क्रोध ।
क्रोधाग्नि भड़कै के तनियो, राजा केँ नैं बोध ॥ 7 ॥

कामदेव के क्रीड़ा समझै, नागिन के फुफकार ।
कैकेयी तेँ अवसर खोजै, कखनी करियै वार ॥ 8 ॥

कोकिलबयनी बात बताबोँ, कहिनें छौँ ई हाल ।
ककरा सिर पर मँडराबै छै, जल्दी बोलोँ काल ॥ 9 ॥

अगर कहोँ तेँ राजा करबै, जे बिल्कुल कंगाल ।
राजा केँ यमलोक पठैबै, अखनी बनबै काल ॥ 10 ॥

दनुज-मनुज के बाते छोड़ोँ, अमर देवता आय ।
हमरा वाणों के आगू मेँ, सब जैतै घबड़ाय ॥ 11 ॥

परिजन, प्रजा, प्राण सुत हमरोँ, सब तोरोँ लेँ मान ।
हम्मैं खाली देखेँ चाहीं, ओठों पर मुस्कान ॥ 12 ॥

अगर यहाँ पर कपट बुझाभों, हममें जो मतिमंद ।
सच्चा मानो वचन निभैबै, रामो के सौगंध ॥ 13 ॥

अपनों उल्लू सीधा करना, कैकेयी के चाल ।
राजा के बोली-वचनो में गलतै देखै दाल ॥ 14 ॥

कपड़ा-लत्ता ठीक करलकै, जेवर देह सजाय ।
राजा के नजदीकें आबी, मन्द-मन्द मुस्काय ॥ 15 ॥

हे प्राण प्रिये दशरथ बोलै, घर-घर में आनन्द ।
चारण कर उच्चारण गाबै, बढ़िया-बढ़िया छन्द ॥ 16 ॥

ढोल-नगाड़ा बजै बधावा, जनता छै खुशहाल
तोरो दशा निहारी हमरा, भारी रहै मलाल ॥ 17 ॥

चन्द्रमुखी मन हर्षित देखी, तोरो मंगल साज ।
कल पाना छै रामचन्द्र के, पावन पद युवराज ॥ 18 ॥

राज्याभिषेक के तैयारी, सुन्दर लगन विचार ।
ई बातें ते भोके लगलै, रानी हृदय कटार ॥ 19 ॥

अन्तर के दुर्भाव छिपावै, ओठो सें मुस्काय ।
राजा के गल्ला मे दै छै, अपनों बाँह फँसाय ॥ 20 ॥

हे प्रियतम तों माँगो-माँगो, कहनें छो सौ बार ।
माँग पुराबै खातिर बोलो, कहिया तों तैयार ॥ 21 ॥

भूलै के सच आदत हमरो, नै रहलै कुछ याद ।
रखी घरोहर माँगै के नै, कोशिश होलै बाद ॥ 22 ॥

झूठ-मूठ नैं दोष चढ़ाबोँ, कहै छिहों दिल खोल ।
वचन निभाबै मेँ नैं कुच्छू, प्राणों के छै मोल ॥ 23 ॥

रघुकुल रीति प्रसिद्ध धरा पर, दू के बदला चार ।
माँगी लेँ वरदान अखनियेँ, थाती छै बेकार ॥ 24 ॥

सच्चा अहिनों तप नैं रानी, झूठा अहिनों पाप ।
तइयो तोरा हृदय-पटल पर, कहिनें पश्चाताप ॥ 25 ॥

अवसर ताकी रानी बोलै, पहिलोँ ई वरदान ।
भरत लाल केँ राजतिलक देँ, राखोँ हमरोँ मान ॥ 26 ॥

दोसर तापस वेष बनैनेँ, भाव विशेष उदास ।
भेजोँ चौदह बरसोँ लेली, रामचन्द्र बनवास ॥ 27 ॥

रानी के कोमल वचनों सेँ, राजा हुवै निराश ।
बात सामनेँ अहिनों ऐलै, जकरोँ नैं आभास ॥ 28 ॥

रंग बदललै राजा केरोँ, बदलै सारा साज ।
लगै बटेरोँ पर धोखा सेँ, झपटी गेलै बाज ॥ 29 ॥

ताड़ोँ गाछी बिजली गिरलै, झुलसी केँ बदरंग ।
ठीक वही ना झलकै छेलै, राजा केरोँ अंग ॥ 30 ॥

आँख बन्द राजा के होलै, मन मेँ भारी सोच ।
वर माँगी मेँ नैं रानी केँ, तनियो टा, संकोच ॥ 31 ॥

अयोध्या पर आबी गेलै, विपत्ति केरोँ राज ।
जंगल-जंगल राम भटकतै, अन्नोँ लेँ मुँहताज । 32 ॥

राजा के ई हालत देखी, रानी के फुफकार ।
विष उगलै छै जेना करतै, राज-पाट केँ क्षार ॥ 33 ॥

राजा सेँ बोलै कैकेयी, बेटा खाली राम ।
भरत सरंगोँ सेँ गिरलोँ छै, जे बिल्कुल नाकाम ॥ 34 ॥

हम्में कहाँ वियाही औरत, लागीँ ठीक रखेल ।
हमरा आगू तनियो टा नै, चलतै तोरोँ खेल ॥ 35 ॥

माँगोँ-माँगोँ वर तों माँगोँ, बोली बड़ी अमोल ।
आजे खुललै हमरा आगू, तोरोँ सब्भे पोल ॥ 36 ॥

अभियो नै कुछ बिगड़ी गेलै, बदलोँ अपनोँ बात ।
सत्य-धर्म के रट्ट लगाबोँ, झूट्टे तों दिन-रात ॥ 37 ॥

सिबि, दधीचि, बलि वचन निभाबै, दैकेँ तन-धन-प्राण ।
स्वारथ येँ तों डुबलोँ अखनी, की देभेँ वरदान ॥ 38 ॥

राजा सोचै कैकेयी केँ, की समझाबौँ आय ।
छाती पर पत्थर राखी केँ, बौलै कुछ मुस्काय ॥ 39 ॥

हे मृगनयनी, मधुर भाषिनी, तोहीं हमरोँ पाँख ।
राम-भरत दोनों भाई ते, हमरोँ दोनों आँख ॥ 40 ॥

भोरे होथैं दूत पठैबै ऐतै दोनों भाय ।
भरत लाल केँ राजा कैरोँ, देबै तिलक लगाय ॥ 41 ॥

रामचन्द्र केँ लोभ जरा नैं, गद्दी के नैं चाह ।
कौशल्या रानी केँ होतै, तनियो टा नैं आह ॥ 42 ॥

हम्मैं खाली बड़का समझी, करनें रहैं विचार ।
तोरा सें नैं पहिनें पूछौं, ई हमरा धिक्कार ॥ 43 ॥

मन-मंदिर सें क्रोध भगाबोँ, सजबोँ सुन्दर साज ।
होतै तुरत अयोध्या कैरोँ, भरत लाल युवराज ॥ 44 ॥

मगर दोसरोँ वरदानोँ सें, हमरा नैं कल्याण ।
सच्चा बोलोँ रानी अखनी, की तोरोँ अरमान ॥ 45 ॥

हँसी - मजाकोँ मेँ बोलै छोँ, तोँ ई गड़बड़ बात ।
जौनें करनें छै दशरथ के, प्राणोँ पर आघात ॥ 46 ॥

जोँ सच्चा अरमान यहै छोँ, रामोँ के की दोष ।
बतलाबोँ हमरा आगू मेँ, परित्यागी सब रोष ॥ 47 ॥

तोँ रामोँ के सराहना मेँ, नैं थक्कोँ दिन - रात ।
होलै कोन कसूर यहाँ पर, बिगड़ी गेलै बात ॥ 48 ॥

बदलोँ तोँ वरदान दोसरोँ, मानोँ विचार नेक ।
तभिये संभव देखेँ पारीं, भरत राज्य अभिषेक ॥ 49 ॥

बिन पानी के मछली जीतै, मणि बिन मनियर ठीक ।
बर्फ जरा सा भी नै पिघलै, सूरज के नजदीक ॥ 50 ॥

अनहोनी सब बातो संभव तइयो ले ई मान ।
रामो बिन नै रहना संभव, दशरथ केरो प्राण ॥ 51 ॥

राजा दशरथ के वाणी से रानी हृदय कठोर ।
नै पिघलै छै, आरू उलटे, चमकाबै छै ठोर ॥ 52 ॥

रानी बोलै तीखो बोली, करभे कोटि उपाय ।
हमरा ऊपर असर जरा नै, की होयौ पछताय ॥ 53 ॥

हम्मे जे माँगे छी दे दे, नै ते तोरो मो न ।
अपयश माथा से नै जैयो, धरले रहयौ धो न ॥ 54 ॥

छल-प्रपंच तोरा मे भरलो, हम्मे छी अनजान ।
भरत बिराजै ननिहालो मे, तौ ते चतुर सुजान ॥ 55 ॥

भूली गेल्हे पूज्य पिता से, करलो कौल - करार ।
दोष एक वरदानो केरो, हमरा पर बेकार ॥ 56 ॥

राम साधु, तौ महासाधु छो, कौशल्यार डू नार ।
मीटो बोलै मे छै माहिर, जानै जन परिवार ॥ 57 ॥

एकखै मे दाँती लागै छी, तोरो देखी हाल ।
रघुकुल केरो नाम बुझैभो, होतै एक मिशाल ॥ 58 ॥

कल प्रातः रौदा उगला पर, सुनो दया के धाम ।
तापस वेष बनैतै आरु जंगल जैतै राम ॥ 59 ॥

अगर जरा-सा आना-कानी, हम्मे देबै प्राण ।
रघुवंशी के मर्यादा के, दुनिया लेतै जान ॥ 60 ॥

राजा बूझी बात सही छै, पकड़ै दोनों पैर ।
बोलो रानी समझाबो तों, रामो सें की बैर ॥ 61 ॥

मस्तक माँगो अखनी देभों जरा न होतै देर ।
रामो के वनवास भेजना, ई होतै अंधेर ॥ 62 ॥

पर रानी के भाव-भंगिमा, बोलै रोग असाध्य ।
फेनू कौनें करे पारतै, वर बदलै ले वाध्य ॥ 63 ॥

आर्त्तनाद निकलै भीतर सें, हे रघुवर । हे राम ।
सिर धुनतें-धुनतें धरती पर, गिरलै धोर धड़ाम ॥ 64 ॥

व्याकुल होलै राजा तखनी, होलै शिथिल शरीर ।
जैसें पानी सें बाहर में, मछली बड़ी अधीर ॥ 65 ॥

आगिन में घी ढारी बोलै, रानी वचन कठोर ।
माँगो रानी, माँगो रानी, झूठे तोरो शोर ॥ 66 ॥

हँसना, गाल फुलाना दोनों, संभव नै छै राज ।
तोरो नाटक करों परदा, पूरा उठलै आज ॥ 67 ॥

दानी आरू कंजूसों में, नैं समझै छौं भेद ।

राजा केरो अज्ञानो पर, हमरा भारी खेद ॥ 68 ॥

योद्धा युद्धभूमि मेँ चाहै, नैं लागै तनि चोट ।

समझी लेँ नीयत मेँ होतै, निश्चित कोनों खोट ॥ 69 ॥

वचन निभाना संभव नैं तेँ बनोँ जरा गमखोर ।

अवला नारी रडो, झूठे तों, व्यर्थ बहाबोँ लोर ॥ 70 ॥

सत्यब्रती तिनका रडू समझै, दारा, सुत, सब धोँन ।

रघुकुल केरोँ नाक कटाना, लागै तोरोँ मोँन ॥ 71 ॥

मर्मभेदी वचन कैकेयी, बोलै सोची खूब ।

राजा चिन्ता के सागर मेँ गेलै पूरा डूब ॥ 72 ॥

भरत चाहतै राजा के पद, नैं हमरा अनुमान ।

वें तेँ करतें रहै हृदय सें, रामोँ के गुणगान ॥ 73 ॥

कुसमय ताकी आय विधाता, कैसैं होलै बाम ।

तोरोँ बोली छेकै हमरोँ, पापोँ के परिणाम ॥ 74 ॥

पंख कटलका पक्षी नाँकी, राजा छै बेहाल ।

पर नैं संभव रानी केरोँ, बदली जाना चाल ॥ 75 ॥

रोतें - धोतें राजा केरो, बीती गेलै रात ।

राजद्वार पर हर्ष-उमंगोँ, के छेलै बरसात ॥ 76 ॥



सर्ग-छह

आज अयोध्या राजभवन के,
शोभा अनुपम न्यारी छै।

रामो के युवराज बनाबै,
के सब्बे तैयारी छै ॥ 1 ॥

वन्दनवार सजैलो सगरे,
राजा के दरवारो मेँ।

स्वर्ग अयोध्या सेँ भी बढ़लो,
की होतै संसारो मेँ ॥ 2 ॥

ढोल-नगाड़ा बाजा-गाजा,
सगरे शोर मचाबै छै।

चारण के उच्चारण देखो,
विरूदावली सुनाबै छै ॥ 3 ॥

पर द्वारी के बाजा के धुन,
दशरथ प्राण जराबै छै।

चारण के उच्चारण राजा,
ऊपर वाण चलाबै छै ॥ 4 ॥

सूर्योदय होयें मंत्रीगण,
सेवक धूम मचाबै छै।

राजा के जागै मेँ देरी,
जरा समझ नै आबै छै ॥ 5 ॥

सब्ये बोलै हे सुमंत्र जी !

राजा जाय जगाबोँ नेँ।

की-की करियै काम जरा सा,

आबी केँ बतलावोँ नेँ ॥ 6 ॥

सुमंत्र पहुँचै राजभवन मेँ,

छैलोँ देखै अंधेरा।

राजा के आगू मेँ छेलै,

दुख-तकलीफोँ के डेरा ॥ 7 ॥

राजा सोचोँ मेँ छै व्याकुल,

मुख-मंडल मुरझैलोँ छै।

सूर्यवंश पर लागे जेना,

राहू-केतू छैलोँ छै ॥ 8 ॥

हे सुमंत्र बोलै कैकेयी,
 राजा नैं कुछ बोलै छों ।
 चिन्ता के की कारण छेकै,
 भेद जरा नैं खोलै छों ॥ 9 ॥

रातो भर बस राम-राम के,
 पूरा रट लगैनें छों ।
 अपना साथे-साथे हमरा,
 पूरा रात जगैनें छों ॥ 10 ॥

पहिनें रामो के बोलाबो,
 हाल पूछिहो आबी के ।
 राजा के मन हरखित होयों,
 रामो के ही पाबी के ॥ 11 ॥

सब सुमंत्र के देखी-देखी,
 मन ही मन घबड़ाबै छै ।
 तब सुमंत्र कुछ बात बतौनें,
 रामो के लग आवै छै ॥ 12 ॥

सुमंत्र जैथें बात बताबै,
 रामचन्द्र झट आवै छै ।
 राजा के निस्तेज जमी पर,
 बुरा हाल में पाबै छै ॥ 13 ॥

होठ सूखलो जै शरीरो,
कैकेयी के वाणी सें, ।

राजा छै बेचैन जेना कि -

मछली बाहर पानी सें ॥ 14 ॥

अहिनों दुख रामो के आगू,
कहाँ अभी तक ऐलो छै ।

कैकेयी के बात निराली,

राजा तें मुरझैलो छै ॥ 15 ॥

महा भयावह देख समस्या,

रामचन्द्र कर जोड़ी के ।

माता सें बोलै हे माता!

बात बताबो फोड़ी के ॥ 16 ॥

दशा पिताजी केरो अहिनों,

कहिनें जरा बताबो ते ।

कष्ट निवारण लेली कोनों,

समुचित राह दिखाबो ते ॥ 17 ॥

रानी बोलै सुनो पुत्र तों,

राजा तोरो मोहो मे ।

जानी-बूझी भसलो लागै,

अज्ञानों के बोहो मे ॥ 18 ॥

राजा आगू दू वरदाने,

हमरोँ थाती घरलोँ छै ।

आज वहेँ माँगे के क्रम मेँ,

चिन्तित देखोँ पड़लोँ छै ॥ 19 ॥

भरत लाल केँ राज तिलक देँ,

माँग सुनी घबड़ैलोँ छै ।

रामचन्द्र बनवास दोसरोँ,

सुनयैँ बस मुरझैलोँ छै ॥ 20 ॥

आरू नैँ कुछ कारण जानौँ,

सच-सच बात बतावै छी ।

माँग बड़ा दुख दाई होलै,

सोची केँ पछताबै छी ॥ 21 ॥

सूर्यवंश के सूर्य सुनी केँ,

स्वाभाविक मुस्काबै छै ।

फेनुँ माता के आगू मेँ,

वाणी मधुर सुनाबै छै ॥ 22 ॥

हे माता! ऊ पुत्र हमेशा,

जानी लेँ बड़भागी छै ।

जे अपनों गुरु मातु पिता के,

वचनों के अनुरागी छै ॥ 23 ॥

हौ बेटा दुर्लभ संसारे,

दुख बूझै माँ-बापो के ।

के भागी होलो छै अपनों,

परिजन के संतापो के ॥ 24 ॥

जंगल में मुनि मिलन हमेशा,

पिता वचन भी मायें छै ।

सौभाग्य उदित हमरो जानो ,

मैया के सहमति साथें छै ॥ 25 ॥

प्राणों सें प्रिय भरत चलैतै,

राज-काज अब जानी लें ।

सार्थक जन्म बनैलहो मैया,

तोहीं अखनी मानी लें ॥ 26 ॥

पूज्य पिता के चिन्तित देखी,

हमरो मन घबड़ाबै छै ।

तुच्छ बात के लेली मुर्छा,

जरा समझ नैं आबै छै ॥ 27 ॥

आरु जों कुछ कारण जानो ,

मैया हमरा बतलाबो ।

कठिन समस्या दूर तुरन्ते,

होतै नैं मन में दाबो ॥ 28 ॥

कैकेयी बोलै ई राजो के,
 मन मे खूबे छानै छी।
 राम-भरत के शपथ खाय के,
 बोलौं नै कुछ जानै छी ॥ 29 ॥

बेटा तौ ते महा विवेकी,
 सोची समझी जानी ले।
 राजा सिर पर अपयश भारी,
 नै आबै ई ठानी ले ॥ 30 ॥

रामचन्द्र के याद करै छै,
 राजा राम पुकारी के।
 मंत्री राजा के बैठाबै,
 वैझै पलथी मारी के ॥ 31 ॥

राम चरण पर लेटी गेलै,
 राजा हृदय लगाबै छै।
 हरखित जेना मणि हैरैलो,
 साँपें फेनू पाबै छै ॥ 32 ॥

शोकाकुल नै बोलै कुच्यू,
 छाती पीटी कुहरै छै।
 रामचन्द्र नै जंगल जैतै,
 ब्रह्माजी के सुमिरै छै ॥ 33 ॥

महादेव केँ करै निहोरा,

औघड़दानी जानी लेँ ।

रामचन्द्र जों जंगल जैतै,

मुशिकल जीना मानी लेँ ॥ 34 ॥

रामचन्द्र के मति फेरी देँ,

हमरा सबकेँ छोड़ी केँ ।

नैँ जैतै वनबास कखनियों,

परिजन सेँ मुँह मोड़ी केँ ॥ 35 ॥

सिर पर लेबै अपयश डेरी,

होबै पापोँ के भागी ।

नरक यातना मंजूरे छै,

मगर राम नैँ बैरागी ॥ 36 ॥

राम बिचारै पिता स्नेहवश,

आरु जो कुच्छू कहतै ।

झूठ-झूठ सब्धै आँखी सेँ,

बेमतलब आँसू बहतै ॥ 37 ॥

रामचन्द्र कर जोड़ी ठाढ़ोँ,

मन ही मन मुस्काबै छै ।

कैकेयी माता के नाटक,

सही समझ में आबै छै ॥ 38 ॥

“पूज्य पिता के आज्ञा पालन,
करते जंगल जाना छै।
फेनू ते हमरा लौटी के,
यहे अयोध्या आना छै ॥ 39 ॥

आज्ञा, आशीर्वाद चाहियो,
हम्में अर्ज सुनाबै छी।
तुरत विदा माँगी माता सें,
लौटी यैठौ आबै छी ॥ 40 ॥

रामचन्द्र निकलै तेजी सें,
माता के लग आबै छै।
बात सुनी माता कौशल्या,
आँखी लोर बहाबै छै ॥ 41 ॥

जेनाँ - जेनाँ जौनें जाने,
कैकेयी के गरियाबै।
की अनहोनी घटना घटलै,
कैसें समझ कहाँ आबै ॥ 42 ॥

चौपट होलै राज अयोध्या,
कुटिल, कठोर कुनारी सें।
राम विदाई माँगी छेलै,
सब सें पारा-पारी सें ॥ 43 ॥



सर्ग-सात

जौनें जानै कैकेयी के,
 ईर्ष्या सें भरलो व्यवहार ।
 दौड़ी - दौड़ी आबे लगली,
 राजा दशरथ के दरवार ॥ 1 ॥

कुल खनदानों के नारी सब,
 सखी-सहेली बैठे साथ ।
 बूढ़ी दादी शील सराहै,
 पकड़ी बोलै दोनों हाथ ॥ 2 ॥

हे कैकेयी तोरो कहियो,
 नैं देखलौं सौतिया डाह ।
 तोरो दशा निहारी देखीं,
 पाना मुश्किल लागै थाह ॥ 3 ॥

कौशल्या के दोष बताबो,
 कहिनें होलै ई आघात ।
 स्वर्ग सरीखा राज अयोध्या,
 जकरा ऊपर बज्र-निपात ॥ 4 ॥

सीता की रहतै रामो बिन,
 लक्ष्मण भी ते मारै हाय ।
 रामचन्द्र बिन भरत लाल के,
 अयोध्या के राज सोहाय ॥ 5 ॥

राजा दशरथ प्राण राखतै,

रामों के बिन कहाँ नुकाय ।

राजा, मंत्री, गुरु वशिष्ठ सब,

अभिये गेलोँ छै मुझाय ॥ 6 ॥

क्रोध - मोह केँ त्याग विचारोँ,

भरत लाल होतै युव राज ।

पर समझाबोँ रामचन्द्र के,

जंगल मेँ की की छै काज ॥ 7 ॥

भरत राज के रामे काँटोँ,

जों तोरा लाघोँ अनुमान ।

घर छोड़ै के रामचन्द्र केँ,

माँगी लेँ दोसर वरदान ॥ 8 ॥

रामचन्द्र वन लेली आतुर,

तकरा रानी लेँ लौटाय ।

शोक मिटै जेना केँ कोनों,

हठ केँ त्यागी करोँ उपाय ॥ 9 ॥

रातोँ के शोभा छै चन्दा,

सुन्दर तन के जेना प्राण ।

वोन्हें राज अयोध्या केरोँ,

रामचन्द्र छेकै दिजमान ॥ 10 ॥

मीटोँ सीख, परम हितकारी,
 सखी सहेली बोलै छै ।
 पर तनियो टा ई बातोँ सें,
 नैं रानी मन डोलै छै ॥ 11 ॥

रोग भयावह लाइलाज छै,
 सखी-सहेली जानी केँ ।
 गरियाबै छै कैकेयी केँ,
 दुष्ट अभागिन मानी केँ ॥ 12 ॥

कानै- बाजै छै नगरोँ के,
 जन्नें-तन्नें नर-नारी ।
 हिन्नें रामोँ के छै पूरे,
 जंगल केरोँ तैयारी ॥ 13 ॥

माता कौशल्या सें माँगै,
 देँ देँ आज्ञा जंगल के ।
 बीती रहलोँ छै अब माता,
 सही घड़ी शुभ मंगल के ॥ 14 ॥

कौशल्या के दुख के वर्णन,
 संभव नैं छै वाणी सें ।
 वहेँ दशा मानी लेँ मन मेँ,
 मीन निकललोँ पानी सें ॥ 15 ॥

धीरज राखी रानी बोलै,
 कठिन समस्या जेना केँ ।
 हमरा आगू आबी गेलै,
 बात बिगड़लै केना केँ ॥ 16 ॥

सूर्यवंश मेँ आग पसारै,
 कौनेँ काठी बारी केँ ।
 राम बताबै कथा समूचे,
 तखनी हारी - पारी केँ ॥ 17 ॥

साँप छुछुन्दर केरोँ हालत,
 कौशल्य के जानी लेँ ।
 धर्म परायण नारी छेलै,
 वोहो तेँ पहिचानी लेँ ॥ 18 ॥

“झूठा स्नेह बढ़ाबौँ आरु,
 बाधा डालौँ कामों मेँ ।
 समुचित नैँ छै बेटा अखनी,
 व्याकुल छै सब गाँमों मेँ ॥ 19 ॥

भला करै भगवान हमेशा,
 सुख के छाया साथों मेँ ।
 दुनिया केँ कल्याण करै के,
 रेखा तोरा हाथों मेँ ॥ 20 ॥

एक डेग नै आगू बढ़लै,
 सीता गिरलै गोड़ों पर ।
 अर्द्धांगिनी तेँ साथ हमेशा,
 हर संकट हर मोड़ों पर ॥ 21 ॥

जीवन ई बेकार लगै छै,
 अगर काम नै आबै छी ।
 अपनों डफली, अपनों रागो,
 अलग कहीं जो गाबै छी ॥ 22 ॥

माता सेँ आज्ञा माँगै लेँ,
 जेन्हें सीता बढ़लोँ छै ।
 रामों के चरणों पर आबी,
 अनुज लखन भी पड़लोँ छै ॥ 23 ॥

‘धैया हम्मै सेवक तोरोँ,
 हमरा तों नै ठुकराबोँ ।
 साथें रहबै, सेवा करबै,
 हाथ रखी सिर दुलराबोँ’ ॥ 24 ॥

नीति निपुण सुख सागर स्नेही,
 रामचन्द्र समझाबै छै ।
 मातु-पिता-गुरु केरोँ सेवा,
 अवसर कम्मै आबै छै ॥ 25 ॥

भरत-शत्रुहन ननिहालो में,
 पिता वृद्ध परिवारों में ।
 सबके सेवा से बढ़िया फल,
 नैं झलकै संसारों में ॥ 26 ॥

लक्ष्मण पकड़ी गोड़ कहै छै,
 सेवक तेँ हाथे मलतै ।
 स्वामी के आगू हरदम्में,
 पछतैतै पर की चलतै ॥ 27 ॥

तों उपदेश सुनैल्लेँ भारी,
 पर हम्में तेँ छी बच्चा ।
 गुरु-पितु-माता तोरा छोड़ी,
 नैं जानौं, मानों सच्चा ॥ 28 ॥

धर्म-नीति, उपदेश सुहाबै,
 तकरा जे बैरागी छै ।
 ओकरा की मन-कर्म-वचनों सें,
 चरणों के अनुरागी छै ॥ 29 ॥

लक्ष्मण के मति गति जानी केँ,
 रामचन्द्र मुँह खोलै छै ।
 मातु सुमित्रा सें आज्ञा लेँ,
 लक्ष्मण केँ तब बोलै छै ॥ 30 ॥

गदगद होलै लक्ष्मण तखनी,
 माता के लग आबै छै ।
 रामचन्द्र सीता के साथें,
 जंगल जैबै, गाबै छै ॥ 31 ॥

माता के मन उदास देखी,
 कथा कहै विस्तारो सें ।
 हमरा राम सिया के छोड़ी
 की लेना संसारो सें ॥ 32 ॥

महा कठिन वचन सुनी सहमै,
 मातु सुमित्रा जानी ले ।
 जैसे हिरणों के चारो दिश,
 आग पसरलो मानी ले ॥ 33 ॥

मन के राखी थीर सुमित्रा,
 कहै जानकी माता छौं ।
 पिता समान हमेशा साथें,
 रामचन्द्र जी भ्राता छौं ॥ 34 ॥

जहाँ राम छै वहीं अयोध्या,
 सीता जैयों साथो मे ।
 सेवा करना काम हमेशा,
 लिखलो तोरा हायो मे ॥ 35 ॥

गुरु-पितु-माता भाय देवता,

सब बढ़लो छै जानो सें ।

रघुकुल शोभै रामचन्द्र सें,

दिन जैसे दिनमानो सें ॥ 36 ॥

राम सिया के साथ रही के ;

सेवा के फल पाना छै ।

राग, द्वेष, मद-मोह कभी नैं,

जीवन मे अपनाना छै ॥ 37 ॥

काम वहे तों करिहो बेटा,

जरा कष्ट नैं रामो के ।

अनुजो के नैं अभाव खटकै,

रामचन्द्र सुखधामो के ॥ 38 ॥

माता के आज्ञा पाबी के ,

हरखित लक्ष्मण मन ही मन ।

तेजी सें श्री रामचन्द्र लग,

आबी गेलै राजभवन ॥ 39 ॥

तीनों राजा दशरथ आगू,

हाथ जोड़ने आवै छै ।

मंत्री राजा के वोही क्षण,

पकड़ी के बैठाबै छै ॥ 40 ॥

सीता साथें राम लखन केँ,
 देखी नृप अकुलाबै छै ।
 मोह - स्नेहवश बारी-बारी,
 अपना लग बोलाबै छै ॥ 41 ॥

राम कहै हे पूज्य पिताजी!
 आज्ञा देँ केँ हरसाबों ।
 रघुकुल केरों रीति निभाबों,
 प्रेम सुधा रस बरसाबों ॥ 42 ॥

होश सम्हारी सीता जी केँ,
 राजा हृदय लगाबै छै ।
 जंगल केरों कथा-व्यथा सब,
 बोली केँ समझाबै छै ॥ 43 ॥

अरून्धती गुरु माता बोलै,
 ससुर-सास कहना मानों ।
 पर सीता केँ रामचन्द्र के,
 साथ-साथ रहना जानों ॥ 44 ॥

राजा के नाटक कैकेयी,
 देखी मुँह चमकाबै छै ।
 तापस वाला वस्त्राभूषण,
 लेँ रामों लग आबै छै ॥ 45 ॥

हे रघुवीर! प्रेमवश राजा,

परलोको के छोड़ी के ।

नरक यातना सहतै लेकिन,

रहलै नाता जोड़ी के ॥ 46 ॥

तोरो मन जे अच्छा लागै,

खूब विचारी करना छै ।

अज्ञानों के आगो मे बस,

राजा के अब जरना छै । 47 ॥

सीख सुनै माता के जखनी,

रामचन्द्र हरसाबै छै ।

वचन-वाण से घायल राजा

तड़पै छै, पछताबै छै ।

रामचन्द्र मुनि वेष बनाबै,

मातु-पिता सिर नावै छै ।

राजमहल से निकली फेनू,

गुरु वशिष्ठ लग आवै छै ॥ 49 ॥

गुरु से आज्ञा माँगी आगू,

रामचन्द्र सिधियाबै छै ।

सीता लक्ष्मण साथे-साथे,

डेग बढ़ने आवै छै ॥ 50 ॥



सर्ग - आठ

पुत्र विरह में राजा दशरथ,

जब गेलै सुरलोक ।

अवधपुरी के जड़-चेतन में,

झलकेँ लगलै शोक ॥ 1 ॥

भरत लाल केँ ननिहालोँ सें,

लानै लेँ तत्काल ।

गेलै दूत मगर नैं बोलै,

अवधपुरी के हाल ॥ 2 ॥

राह धरलकेँ अवधपुरी के

सबकेँ जोड़ै हाथ ।

चलै माण्डवी, श्रुतिकीर्ति भी,

दोनों केरोँ साथ ॥ 3 ॥

जैसे धरलक अवधपुरी में,

भरत लाल जी पाँव ।

कानाफूसी होते देखै,

गाछी केरोँ छाँव ॥ 4 ॥

राजभवन में झलकै छेलै,

चिन्ता केरोँ छाप ।

भरत लाल कुछ भी नैं समझै,

कहिनों ई संताप ॥ 5 ॥

कैकेयी झट पास बुलाबै,

बोलै मीट्रोँ बोल ।

भरलोँ जहर घड़ा के मुँह पर,

मिसरी केरोँ घोल ॥ 6 ॥

भरत लाल जानै लेँ बौला,

पूछै मन के बात ।

मैया बोलोँ राजभवन में,

की होलै आघात ॥ 7 ॥

कैकेयी मुस्काबै मन-मन,

भरै भरत के कान ।

बतलाबै झटपट राजा सेँ,

माँगै जे वरदान ॥ 8 ॥

आग बबूला सुनयें होलै,

भरत बहाबै लोर ।

कानी-कानी बोले लगलै,

“पाप हुआ घनघोर” ॥ 9 ॥

रघुकुल भूषण रामचन्द्र को,

आज मिला वनवास ।

माथे पर कैसे गिरा नहीं,

आकर के आकाश ॥ 10 ॥

कोख लजायी तुमने अपनी,

कर के अत्याचार ।

तुम जैसी जननी को जग में,

लाख-लाख धिक्कार ॥ 11 ॥

कैकेयी तब भरत लाल के,

पीठी पर दै हाथ ।

भरत लाल कड़कै मैया पर,

“मैं हो गया अनाथ ॥ 12 ॥

मत छूओ मुझको हाथों से,

बाँटो नहीं कलंक ।

जहरीली तेरी वाणी में,

बिच्यू का है डंक ॥ 13 ॥

गली नहीं क्यों जीभ तुम्हारी

जब माँगी वरदान ।

उल्टे मेरे पूज्य पिता के,

निकल गये झट प्राण ॥ 14 ॥

राज करो तुम अवधपुरी में,

छोड़ भरत का मोह ।

मुझसे सहा नहीं जाता है,

भैया राम विछोह ॥ 15 ॥

कैकेयी अब नाम कलंकित,

नाम हुआ बदनाम ।

जग में कोई भी न रखेगा,

कैकेयी अब नाम' ॥ 16 ॥

जीवन में घूमो तों जतना,

देखो गामे गाम ।

नैं ककरो बेटी के मिलयौं,

कैकेयी अब नाम ॥ 17 ॥

भरत लाल के द्वारा होलै,

पूर्ण दाह-संस्कार ।

पर नैं जीयै के कुछ रहलै,

बाँकी अब आधार ॥ 18 ॥

लौटाबेँ रामोँ केँ गेलै,
पर सब्भे बेकार ।

चरण पादुका गद्दी राखी,
पूजै लेँ तैयार ॥ 19 ॥

भरत निभाबै भाईचारा,
बड़ा अनूठा काम ।

चौदह बरस बिताबै तापस,
भेषेँ नन्दी ग्राम ॥ 20 ॥

माता कैकेयी सेँ बोलै,
तापस भेषेँ राम ।

अब जग के कल्याण करै में,
लगबै आठो याम ॥ 21 ॥

आगू बढ़लै राम दिखैनेँ,
मुख - मंडल पर तेज ।

फूलोँ के बदला जंगल में,
काँटोँ केरोँ सेज ॥ 22 ॥



सर्ग - नी

बड़ी लगै विचित्र कहानी,

सोचोँ करोँ विचार ।

तोँ घर के कोनों कामोँ मेँ,

खोजै छोँ परिवार ॥ 1 ॥

बहिनी-बेटी केँ बोलाभो,

बेटा अगर विदेश ।

शुभ कामोँ मेँ आबै लेली,

देयैँ छोँ सदेश ॥ 2 ॥

जोँ कुटुम्ब-परिवार एक भी,

नैँ आबै संयोग ।

तोरोँ यज्ञ सफल नैँ कहयोँ,

गामोँ केरोँ लोग ॥ 3 ॥

धरत - शत्रुहन ननिहालोँ मेँ,

पत्नी उनखै संग ।

नाना-मामा भी नैँ आबै,

सुनयैँ होभेँ दंग ॥ 4 ॥

नीता नैँ भेजैलोँ गेलै,

जनक राज केँ भाय ।

लागै छै कुच्छू तेँ होतै,

यै मेँ भी चतुराय ॥ 5 ॥

राजा दशरथ मन-मन सोचै,
 भरत राम के भक्त ।
 पर मन चंचल बदलेँ पारेँ,
 कहियो कोनों वक्त ॥ 6 ॥

अपना पर उनका कुछ शंका
 “खो ना जाय विवेक ।
 अतःशीघ्र ही रामचन्द्र का,
 करना है अभिषेक ॥” 7 ॥

सीता जी आरू लक्ष्मण केँ,
 नैँ छेलै वनवास ।
 दून्हूँ जोड़ै हाथ राम केँ,
 बनलोँ दासमदास ॥ 8 ॥

समझैलोँ नैँ जरा रखलकैँ,
 जंगल गेलै साथ ।
 साथ निभैतें रहलै उनकोँ,
 जे अनाथ के नाथ ॥ 9 ॥

राजा दशरथ केँ नैँ संभव,
 दूर नजर सें राम ।
 इनियो साथ जैतियै जंगल,
 मंगलमय सब काम ॥ 10 ॥

माता-पिता श्रवण के देनें,
 छेलै जे-जे शाप ।
 टली जैतियै कुछ्छू दिन ले,
 शापो अपने आप ॥ 11 ॥

वादा केँ झुठलाबै खातिर,
 सोचै बात अनेक ।
 पर होनी नैं चलेँ देलकै,
 मारै सकल विवेक ॥ 12 ॥

रामोँ केँ नैं लोभ राज के,
 जानै सकल जहान ।
 राज-काज मन सें त्यागी केँ,
 बनलै भरत महान ॥ 13 ॥

चौदह बरस बिताय अयोध्या,
 लौटे जब श्री राम ।
 सब सें पहिनेँ कैकेयी सें,
 मिलै दया के धाम ॥ 14 ॥

राम कहै हे माता तोहीं
 सफल बनैलहेँ जन्म ।
 मोल चुकाना संभव नैं छै,
 करी यत्न आजन्म ॥ 16 ॥

हाथ तुरत कैकेयी जोड़े

“मेरा कुछ अरमान ।

पूरा कर तुम दिखलाओगे,

ऐसा है अनुमान ॥ 16 ॥

कहने से पहले लेकिन तुम,

शर्त करो हे राम ।

तब मैं बतलाऊँगी तुमको,

मेरा जो है काम ।” ॥ 17 ॥

राम गिरै गोड़ों पर ठाढ़ें,

‘बतलाबो तों काम ।

स्वर्ग - धरा के एक बनैतै,

तोरा लेली राम ।” ॥ 18 ॥

कैकेयी माता नम्र भाव सें,

बोलें ‘मेरा काम ।

भरत लाल से माँ कहला दो,

हे पुरुषोत्तम राम’ ॥ 19 ॥

राम मिलै जब भरत लाल के,

कहै ‘कहूँ इक बात ।

पहले शर्त करो कुछ भाई?

बोलूँगा पश्चात ॥ 20 ॥

खाड़ोँ होलै कान भरत के,
 विहवल तोड़ै मौन ।
 'हे भाई अब शीघ्र बतायें,
 पड़ी समस्या कौन ॥ 21 ॥

जीवन भी अर्पणा कर दूँगा,
 जरा नहीं संदेह ।
 पुरुषोत्तम श्री रामचन्द्र से,
 अलग कहाँ अब नेह ॥ 22 ॥

शर्त करूँ अपवाद मगर है,
 इक छोटी सी बात ।
 कैकेयी को माँ कहने की,
 हठ ना करना तात" ॥ 23 ॥

राम भरत के देखी - देखी,
 बोलै छै मुस्काय ।
 'माता को माता कहने में,
 कहाँ कष्ट है भाय ॥ 24 ॥

जन्म दिया माता ने सबको,
 बहुत उठाया कष्ट ।
 माता से बढ़कर कोई भी,
 है नहीं कहूँ स्पष्ट ॥ 25 ॥

भरत कहै छै 'जन्म अगर दी,
जननी होगी तात ।

माता ममता वाली होती,
यह तो जग विख्यात ॥ 26 ॥

ममता जरा नहीं है जिसको,
कैकेयी का रूप ।

कैकेयी की जरा न उपमा,
वह तो बनी अनूप' ॥ 27 ॥

राम कहै छै 'तुम तो पगले,
सोच रहे हो व्यर्थ ।

जननी, माता, माँ सबका तो,
सदा एक है अर्थ ॥ 28 ॥

मातु पिता-गुरु के आगे में,
झुकना सबका धर्म ।

तुम मर्मज्ञ महाज्ञानी हो,
समझो इसका मर्म ॥ 29 ॥

रामों के आगू में झकलै,
भरत ज्ञान-भंडार ।

भाई हो तो भरत सरीखे,
जानै छै संसार ॥ 30 ॥



हीरा प्रसाद 'हरेन्द्र' : एक परिचय

जन्म : 06/09/1950, कटहरा, सुलतानगंज, (भागलपुर)

सम्मान/पुरस्कार/उपाधि :

1. डॉ० अम्बेदकर फेलोशिप, राष्ट्रीय सम्मान (05/12/2001)
(दलित साहित्य अकादमी, दिल्ली)
2. खूब लाल महतो स्मृति पुरस्कार (उत्तंग हमरो अंग लेली)
(अ० भा० अंगिका साहित्य कला मंच) (09/06/2001)
3. जगदीश पाठक मधुकर-कुल विभाकर (05/05/2002)
(समय साहित्य सम्मेलन, पुनसिया, बाँका)
4. इन्दिरा देवी स्मृति सम्मान (12/08/2003) (बरियारपुर, मुंगेर)
5. जनार्दन बाबू रजत स्मृति सम्मान (08-09/11/2003)
(अ० भा० अंगिका साहित्य कला मंच, खगड़िया)
6. पंडित गोपी नाथ तिवारी पुरस्कार (25/12/2005)
जाह्नवी अंगिका संस्कृति संस्थान, पटना
7. सरला स्मृति साहित्यकार सम्मान (अंगप्रिया के सफल सम्पादन लेली)
जानकीपुर पबई (बाँका) (09/12/2007)
8. गोपाल प्रसाद सिंह सेवा निवृत्त प्र० अ० स्मृति सम्मान
(बाबा दूबे भयहरण स्थान सलेमपुर, अमरपुर (बाँका) 8 मार्च 2008)
9. भारतेन्दु हरिश्चन्द्र रजत स्मृति सम्मान ('ठकहरा' लेली) (15/06/2008)
(हिन्दी भाषा साहित्य परिषद्, खगड़िया)
10. पंडित जगदीश पाठक मधुकर, काव्य साहित्य साधना स्मृति सम्मान
(भागलपुर प्रमण्डलीय अ० भारतीय भाषा साहित्य सम्मेलन)
11. स्व० वैकुण्ठ विहारी स्मृति सम्मान (तारापुर, मुंगेर)
12. राहुल सांकृत्यायण स्मृति सम्मान (21 फरवरी 2010)
अन्तर्राज्य सदभावना बहु-भाषी काव्योत्सव, उधाडीह, भागलपुर
13. आदिकवि सरहपा स्मृति सम्मान (11 अप्रैल 2010)
अ.भा. अंगिका साहित्य कला मंच सरहपापुरम् कहलगौव
14. जय प्रकाश मोदी स्मृति सम्मान (14 मार्च 2011)
15. सीताराम सिंह स्मृति सम्मान (28 अप्रैल 2012) गुलनी कुशाहा, बाँका

16. अवध भूषण मिश्र स्मृति सम्मान (3 अगस्त 2012) चौक बाजार, मुंगेर
17. भगीरथ बाबा अंग साहित्य सम्मान। 01.02.2014, अखिल भारतीय अंगिका साहित्य विकास समिति
18. महताब अली रजत स्मृति सम्मान। 09.03.2014
19. उमानाथ पाठक स्मृति सम्मान। 30.03.2014
अजगवी नाथ साहित्य मंच, सुल्तानगंज
20. बाबा बिसु राउत स्मृति सम्मान। 12.03.2014
बाबा बिसु राउत इन्टर कॉलेज, चौसा (मधेपुरा)
21. श्री राम स्मृति सम्मान। 14.05.2017 गालीमपुर, अमरपुर (बाँका)
 1. कवि रत्न (विक्रमशिला हिन्दी विद्यापीठ)
 2. अंग श्री (अ० भा० भाषा साहित्य सम्मेलन प्रमंडलीय शाखा, भागलपुर)
 3. अंग श्री (क्षेत्रीय सर्वभाषा कवि सम्मेलन, खड़िया, मुंगेर)
 4. साहित्य श्री (अ० भा० साहित्य सम्मेलन भोपाल)
 5. साहित्य रत्न (मंगनी लाल स्मृति ट्रस्ट, बौंसी, बाँका)
 6. अंग शिरोमणि (राज्य स्तरीय सर्व भाषा सद्भावना काव्योत्सव, उधाडीह, भागलपुर।
 7. कवि शिरोमणि (विक्रमशिला हिन्दी विद्यापीठ, गाँधीनगर, ईशीपुर, भागलपुर)
 8. हास्य शिरोमणि (महादेवपुर, अमरपुर, बाँका)
 9. पंचशील शिरोमणि (पंचशील चैरिटेबुल सोसायटी, 25/4 कड़कड दुम्म एरिया, सेंट्रल बैंक के ऊपर, नई दिल्ली 110092-भारत)
 10. अंग विभूति (राजकीय बुनियादी म० वि० गुल्नी कुशाहा, बाँका।
 11. साहित्य गौरव (अजगैवीनाथधाम सुल्तानगंज।
 12. अंग-पतंग (अ०भा० अंगिका साहित्य सम्मेलन, जिला शाखा-भागलपुर
 13. अंगिका सपूत (अ०भा० अंगिका साहित्य कला मंच प्रखण्ड शाखा-शंभुगंज)
 11. महाकवि - (विक्रमशिला हिन्दी विद्या पीठ)
प्रशस्ति (देर साहित्यिक संस्थाओं द्वारा)
देश विदेश के स्तरीय पत्रिका में रचना प्रकाशित आरू आकाशवाणी भागलपुर तथा दूरदर्शन पटना से अंगिका आरू हिन्दी रचना संप्रसारित
शैली-विसंगति में हास्य खोजी के व्यंग्य प्रहार करना।
महामंत्री-अखिल भारतीय अंगिका साहित्य कला मंच।
सम्प्रति-सम्पादक-मजिल/अंगप्रिया/देवायतन
सम्पर्क - ग्राम+पोस्ट-कटहरा, सुलतानगंज (भागलपुर) - 813213
मो० - 9931854246



हीरा प्रसाद 'हेन्द्र' कृति

1. उत्तंग हमरो अंग (अंगिका काव्य संकलन)
भा०वि०वि० पाठ्यक्रम में
2. संस्मरण चक्र (हिन्दी संस्मरण)
3. उद्वेलित उद्गार (हिन्दी काव्य संकलन)
4. बहिष्कार (अंगिका एकांकी)
5. सोना के दाँत (अंगिका काव्य संकलन)
6. ठक्करा (अंगिका एकांकी)
7. के करतै तकरार (अंगिका गजल संग्रह)
8. राधा (अंगिका प्रबंध काव्य)
9. तिलकामाँझी (अंगिका महाकाव्य)
10. शंबूक (अंगिका खण्ड काव्य)
11. धन्नू बाबा (अंगिका प्रबंध काव्य)
नई बात दैनिक में धारावाहिक प्रकाशित
12. भावांजलि (कुण्डलिया और दोहे संकलन)
13. स्वावलम्बी बालिकाएँ (हिन्दी एकांकी संग्रह)
14. कारूदास (लोकगाथा पर आधृत उपन्यास)
15. निष्कलकिनी (अंगिका खण्ड काव्य)